



大明會典卷之一百五十二

兵部三十五

馬政三

起解

國初種馬課駒俱搭配補種餘即變價入官未有  
解俵者。正統十四年始於孳牧內歲取備用馬  
二萬匹寄養京府以備不時調兌是為起解之  
始。後又令各府州縣每歲將應解馬匹隨數多  
寡分春秋二運。成化以來多所蠲貸或豁免或  
停派或緩徵或改折定以分數年限各視其災  
之輕重以為等



計各處備用馬每歲額數

直隸大名府二千一百七十六匹內擠乳馬七匹

保定府一千五百八十九匹內擠乳馬八匹

順德府七百四十三匹內擠乳馬五匹

廣平府七百五十四匹內擠乳馬五匹

真定府三千五百二十七匹內擠乳馬十匹

河間府一千七百二匹內擠乳馬五匹

永平府九百三十四匹內擠乳馬十匹

河南開封府二百五十七匹

彰德府二百三匹

衛輝府八十三匹

歸德府考城縣六匹

山東濟南府二千六百六十八匹

兗州府二千八百一十二匹

東昌府六百七十六匹

在京在外各衛所歲各一匹

應天府各縣并帶徵滁州衛共八百九十一匹

八分內折色八百四十二匹八分

直隸鳳陽府各州縣共一千八百八十六匹內折

色四百四十六匹

揚州府除海門外九州縣共一千四十五匹

內折色五百四匹

淮安府各州縣共一千一百九十七匹

內折色五百匹

廬州府除英山外七州縣共八百七十六匹

原折色一百五十七匹後俱改折

滁州并各縣又帶徵滁州衛共二百一十五

匹俱改折

和州并含山縣共一百二十八匹

徐州并蕭碭山豐三縣共一百五十四匹

廣德州建平縣一百六十四匹

寧國府南陵縣一百五十四匹

鎮江府各縣共四百六十八匹

太平府各縣共二百九十四匹

凡徵解備用馬匹。正統十四年令歲取備用馬

二萬匹。北直隸河南山東取七分。南直隸三分。

俱限八月以裏解部。發太僕寺驗印給俵。

後增減分數。本色折色。節年不等。

○弘治三年議准。每歲取一萬匹。

北直隸河南山東并南徐州所屬俱解本色。內永平府折色本色中半。廬鳳二府。滁和二州本

色七分。折色三分。淮揚二府。江浦六合二縣。本色四分。折色六分。應天各屬。鎮江。太平。南陵。建平。俱解折色。○正德二年。奏准。派取各處備用馬二萬五千匹。太僕寺所屬。取七分。俱本色。南京。太僕寺所屬。取三分。本折色中半。北直隸。山東。河南。限六月終。南直隸。限七月終。各差管馬官解俵。○十一年。奏准。今後奏派寄養馬。每年不過二萬匹。若兌給京邊之外。積有多餘。量再減派。毋致累民。○十二年。奏准。備用馬。除沛縣免派外。徐州止派六十匹。蕭縣三十匹。碭山縣四十匹。豐縣二十匹。俱先儘上中戶內人丁。每四十五丁。歲朋出馬一匹。折徵銀十五兩。其實應清河縣。各於原派數內。減派二十五匹。興化縣。高郵州。各減派二十匹。邳州。江都。宿遷。鳳陽。桃源等縣。各減派一十匹。俱先儘極貧無產下戶。○又令每年徵解備用馬。以二萬五千匹。立為定例。如積有餘馬。量減本色。扣加折色。積有餘銀。留候用馬數多年。分作價收買。○嘉靖四年。令扣算寄養備用馬匹。歲常有二萬之數。不必多派。以累小民。其起俵馬駒。酌量地方豐歉。

加派折色。送寺收貯。以備臨時買馬。○七年題准。以地方災傷。山東沂州。魚臺。郟。單。滕。費等六州縣備用馬。俱派折色。其餘太僕寺所屬地方。量派本色馬三千匹。餘馬一萬四千五百匹。亦徵折色。每匹徵銀十五兩。均作二運。南京太僕寺所屬。通派折色。每匹徵銀十四兩。俱作一運。○八年題准。見在寄養馬數多。將歲派本色折色。俱照七年例。原係折色者。每匹徵銀十八兩。本改折者。每匹二十兩。○三十三年題准。北直隸。山東。河南災傷。將預徵七分馬匹改派。災重

者改折色三分。仍徵本色四分。次災者改折色二分。仍徵本色五分。每折色一匹。徵銀二十四兩。○三十七年題准。南直隸各府州縣備用馬匹。以後俱派折色。內原係折色者。徵銀二十四兩。本改折者。徵銀三十兩。○四十二年題准。各州縣起解備用馬。每匹徵銀二十七兩。內二十二兩。給馬戶買馬。五兩充為路費。務要看驗合式。○又議准。沂。費。郟。滕。嶧。五州縣備用馬。以後俱改徵折色。○四十五年議准。寄養馬。大約總計止用三萬。此外不許多派。○隆慶元年題准。

各處起解備用馬匹。每匹徵銀三十兩。全給馬戶買解。不許扣留。○四年議准。本年備用馬。北直隸。山東。河南。一萬七千五百匹。內本色八分。折色二分。南直隸。七千五百匹。全派折色。其本色馬。俱要揀選。方許起俵。折色照例不分南北。每匹徵銀二十四兩。○萬曆元年題准。北直隸。山東。河南。備用馬。本折均配。真定。大名。濟南。開封。衛輝。彰德。六府為一半。保定。順德。廣平。永平。河間。東昌。兗州。歸德。八府為一半。每年輪派一半徵解。折色一半徵解。本色○六年議准。廬州。

滁。和。與。鳳。陽。輪派如北方例。○七年題准。廬。鳳。滁。和。舊徵本色七分者。今減為六分。

凡起解南馬。成化二年奏准。南直隸起解備用馬。有矮小不堪。及不足數者。每匹徵銀十兩。解部發貯太僕寺。以備收買。○二十一年奏准。南備用馬。從各府州縣徑解北京交俵。如有拖欠。及補完之數。仍行南太僕寺照查。凡管解官員。嘉靖元年奏准。歲派備用馬。本色折色。俱管馬官依限解部。發寺驗俵。寄養貯庫支用。不許差吏及改差土官義民人等管押。以

致中途作弊。若違限年終類參。州縣掌印管馬官。俱提問罰俸。○四十三年題准。各府管馬通判。每年九月。給領總批。限十月終。親赴部查比。候該府馬匹銀兩解俵完日。方許掣批回府。如違例不行總部。及改差代解者。參究提問。○隆慶二年。題准。各違限違例。每歲終。太僕寺呈部查究。行各該巡按御史。提問奏報。不許延至隔年。其不赴掣總通判。及吏役遲慢等項。該寺徑行查處。○萬曆三年。題准。各州縣起解折色馬價。徵解府庫。照依春秋二運原限。選委州縣佐貳。類總解部。發寺交納。年終該府通判。赴部掣總查比。

**印俵**

凡印馬差官。舊例兵部請

旨點差公侯伯。或駙馬一員。本部委官一員。○景泰間。革去侯伯等官差御史二員。同兩京太僕寺。分管寺丞印俵。○天順初。復差公侯伯。及御馬監內官一員。○成化初。革去內官侯伯。每歲九月中請

旨差御史二員。同該管寺丞。分行印俵。○嘉靖二年



議准自三年為始。遵照成化初年事例。於九月終奏差御史請

勅分投前去各該地方。公同分管寺丞。查點種馬。遇有倒失。即令馬戶買補。作踐致死者。照例追陪。各年拖欠備用馬匹。逐一查追批迴。催督完解。其各府州縣管馬官員。內有盡心職業。馬政修舉者。一體旌獎。貪懦不職。諂悅上官。營求別委。荒廢本職。應提問者。提問。應參奏者。參奏。每遇三年之期。仍照常請印點烙。待後種馬蕃盛。足勾原額備用馬匹。不致拖欠。照舊停止。○近

例。併差御史一員印馬

今種馬變賣。印烙不行。

凡印烙馬駒。舊例孳生備用騎操折易并進納馬匹。俱印烙以防姦弊。其孳生及陪納馬駒。應交俵者。印訖。差官照依地方日期。將空閒增出人丁。俵散領養。造冊具奏。各處印中備用馬匹。徑解兵部。發太僕寺交納。以憑俵散。○洪武間。令孳生馬駒。江南每年三月初一日。赴南京牧馬千戶所印俵。江北每年三月十五日。赴南京太僕寺印俵。○正統四年。奏准。應天鳳陽等處孳生陪補馬駒。南京太僕寺官。同南京兵部委

官及御史分投印俵○九年奏准鎮江府所屬於本府太平寧國府廣德州所屬於太平府印俵○成化十六年令凡馬非經官印驗者不收○弘治四年奏准凡印烙馬匹民馬照舊印左給軍則印右如京營邊關馬無右印即係盜買民間官馬追究問罪○九年令孳生駒齒少力強而不及四尺以上者亦聽印俵

凡印馬字樣洪武中孳生駒用云字小印俵散作種者用大印給軍騎操者再用云字印○嘉靖三十五年議准寄養馬印官字五軍等營印

五字樞字機字巡字○隆慶五年寄養馬印寄字錦衣衛勇士營四衛營印衣字士字四字

凡免印馬匹成化二十一年奏准賞補備用馬免其用印止令起解以備選擇○弘治六年令孳生兒駒看驗不堪及羸駒多餘者俱免印烙從其變賣以充買補備用之數

凡贓罰馬匹舊例刑部追買本色送部發寺寄養○隆慶五年改撥京營給軍騎操○萬曆二年議准軍犯應罰馬匹刑部追銀送部發營責買贖馬仍送驗印給軍

關換

官軍騎操聽征。例應關撥馬匹。其事故及不能養者。則令轉兌。如征操缺馬數多。則于寄養等馬內調兌。又有關領馬價自行收買者。例各不同。

凡關換馬匹。洪武二十六年定。凡官軍關撥馬匹操練。行移到司。須要該衛官吏保結。關馬官軍原有馬匹下落。果係曾經征進慣戰人數。及無馬匹。方纔具奏關撥。後有事故。該衛拘收還官。其軍官軍人等奉

旨關撥馬匹。亦須備知數目。○又例。凡各衛原關馬。羸驢轉名銷號。若係御馬監關領者。該府各衛自具手本赴監轉名銷號。如是典牧所太僕寺關領者。各府衛取勘明白。行本部轉行太僕寺典牧所銷號。○永樂四年。令管步軍官告關馬者。不准有騾馬與兒馬願換者。聽。○宣德四年。置給馬勘合。每關馬一匹。給勘合一道。填寫齒色年月。付領馬之人收執。遇倒死等項。陳告。註寫應償者。追視齒色附簿。開註勘合與馬。如前收領。再有事。故。照例償給。如領馬之人有故。馬

及勘合。從所管轉付應得之人收領。凡應償者。追視御馬監印烙。然後給與。○正統四年奏准。官軍領馬騎操。必行本衛造冊送部。并太僕寺。外衛操備者。行該府造冊關領。○天順二年奏准。官軍領馬。太僕寺具俵過數目毛齒。及官軍姓名年月。行各衛造冊送部。如關領數多。開報數少。或倒失轉交。隱匿不報者。許諸人首告。拏問。○弘治元年奏准。南京官軍應關馬匹。在江北者。赴南京太僕寺給領。在江南者。本寺委官一員。赴南京給散。○二年。令騎操馬老病當關。

給者。原馬送光祿寺支用。○四年奏准。領馬官軍。有不照次第混亂爭奪者。叅送法司問罪。罰馬一匹。就給本身騎操。以後更不關給。○七年奏准。官軍應關馬匹。兒馬八歲以上。駟馬十二歲以上。別無傷殘者。並准給領。各衛及邊關亦照此例。○正德八年奏准。直差官旗校士將軍。原領馬匹。殘疾老弱。不堪直差者。送光祿寺交收。本部照數行太僕寺。於順天府所屬寄養馬內。派取。及行該衛委官赴御馬監印烙。撥給領養。直差。○嘉靖二十二年議准。將軍關換馬匹。

務要用心餵養。不許違例雇借騎馱。尅減草料。若致倒失。照例於本主名下追買堪中好馬補還。○四十三年。令將京營勘合從新印換。仍通行各邊鎮。一體編置給軍。○隆慶二年。議准京營馬軍各填給勘合一張。以便查對。如有倒死病瘦。報部查明。七八年以上。方許交送另補。以下。不准交送。倒死責令賠償。仍赴司驗印。○又議准錦衣衛老病馬。年終送光祿寺者。先執勘合赴兵部該司查其年限。如領馬七八年以上。殘病者。方許交送。另行闕補。以下。仍令喂養。不

准送寺。倒死即令賠償。

凡轉兌馬匹。天順元年奏准。各營外衛官軍。原領騎操馬匹。下班之日。兌與在京官軍。該管官造冊送部。○嘉靖七年。題准。各營提督內外大臣。委各坐營等官。將見在馬隊官軍。逐一查審。除有力堪以喂養者。照舊不動外。其餘貧難單丁。不能養者。將原領馬匹。兌與有力官軍喂養。以後關領馬匹。亦要照前查給。敢有容情扶同。故行私領單丁貧軍。意圖侵尅草料。致有倒失數多者。查叅治罪。○三十三年。題准。凡兌馬事

故轉兌者。該管官即呈巡視科道。於原額勘合填註年月官軍姓名。仍送該司查照。將原兌馬冊。亦改註明白。用印鈐蓋。如有官軍私換馬匹。事發送問。該營官容隱不行呈報者。聽巡視科道官參究。○四十二年題准。各營轉兌馬匹。務要遵例赴司告填印鈐。以憑查考。敢有仍前私兌。查出比照新馬椿銀追納。

凡調兌馬匹。如在各營。在外各邊官軍缺馬騎操。總鎮等官具奏關領。兵部議擬題准。行移太僕寺。於順天府所屬寄養本色馬內。選取給領。

兵部定限調軍候兌。京營於太僕寺。委司官會同少卿兌給。宣府於居庸關。大同於紫荊關。薊州保定。於適中地方。委司官會同寺丞前去兌給。其餘各邊入衛。在薊。准討補本色。餘俱不准。○嘉靖十三年題准。團營聽征馬匹。多不過二萬之數。再有萬匹存營操守。猶有寄養馬匹二萬。鄰近易取。若軍士堪養馬者數少。亦不必濫給。將聽征馬匹。擬為定數若干。每遇事故倒失。五百匹以上。行太僕寺兌給一次。以為常規。○二十九年題准。各邊兵調赴薊鎮春秋兩防。遇

馬缺乏。俱借充孳牧寄養馬騎。征事畢仍還馬戶。○三十三年題准。充馬先儘寄養。如果不敷。方允種馬。○隆慶三年議准。調充京邊官軍馬務。照次第關領。果係不堪。方許抵換。收有故意刁蹬。及倚勢混爭。聽該寺叅送問罪。

凡奏討馬價。弘治七年奏准。凡各邊缺馬騎操。奏關銀兩收買者。兵部委官一員。同太僕寺官于收貯馬價內。照數支出。差官運赴鎮巡官處交收。○隆慶五年題准。各邊奏討。果係十分緊急。方准給發馬價。別項濫討。即與停寢。

舊額各營各邊并錦衣衛騎操馬數

五軍營原額馬九千五百六匹

神樞營原額馬四千四百六十四匹

神機營原額馬一萬五十四匹

奮武等十二營原額馬一十三萬八千九百

一十九匹

宣府原額馬四萬五千五百四十三匹

大同原額馬四萬六千九百四十四匹

延綏原額馬二萬二千二百一十九匹

甘肅原額馬二萬六千五百六十四匹

陝西原額馬一萬六千一百八十三匹  
寧夏原額馬一萬九千五百九十五匹  
山西三關原額馬九千六百六十五匹  
遼東原額馬四萬六千六十八匹  
薊州鎮原額馬二萬二千七百七十四匹  
通州守禦操備捕盜馬四百七十五匹  
守備真定等處原額馬一百匹  
守備德州原額馬一百四十二匹  
守備紫荆關原額馬四百七十七匹  
守備三河等城原額馬一百三十七匹

分守密雲古北口原額馬三千一百六十七匹

錦衣衛原額馬一千八百五匹

旗手衛原額馬四十四匹

嘉靖以後續增各處馬數

三大營馬。隆慶元年題准。正兵共三十枝。內  
戰兵。每營給馬一千匹。車兵。每營給馬二  
百匹。城守。每營給馬五十匹。備兵三枝。每  
營給馬二百匹。執事營一枝。給馬五百匹。  
隨征官軍。給馬一千匹。各營選鋒。給馬五



千匹

京營家丁馬。隆慶元年題准。共給五百匹。

奠靖所馬。嘉靖二十一年。初設奠靖所。屬鞏

華城守備下防護。

行宮。二十二年議准。給馬一百匹。巡邏

昌平鎮馬。嘉靖四十年。以本鎮為護

陵重地。永安營馬。僅二百餘。准照鞏華營例。調取寄

養馬八百匹。四十一年。又議准。選補軍二

百名。給馬一百匹。以把總統領兩班巡邏。

隆慶四年。又增補前馬。共二百匹。是年又

給

天壽山巡邏官軍馬三十匹

張家灣備禦營馬。嘉靖四十三年。初設本營。

議准。允給馬五十匹。四十五年。又增給馬

五十匹

三河守禦營馬。嘉靖三十七年。以本營路當

衝要。准給本縣寄養馬一百匹。專備護哨

緝盜。傳達邊報等役。

保定各營馬。嘉靖四十三年。議准。保定標兵

營補足馬三千匹。四十四年。保定。定州。達

軍二營。奇軍一營。每營各給五百匹。正兵營一百匹。隆慶二年。增給達軍二營各三百匹。常川騎征。不許借兌。萬曆二年。保定西關一帶。設立車騎二營。其馬將真定等府庫貯各項軍需等銀一萬一千五百一十兩。照數動支。行令收買臆壯馬羸印烙給發。

薊鎮入衛馬。嘉靖二十九年。各邊兵入衛缺馬。討補以為常。隆慶六年。議准。除在途不補。在薊倒死者。如每營正馱馬二千餘匹。

倒死二百匹以下者。准補。過二百匹之上。止量給二百匹。以為限制。

通州。遵化。昌平。三河。密雲。涿州。薊州。永平等八城鎮邊等三區馬。嘉靖四十年。議准。各給一百匹。專備捕盜。

宣大二鎮各城堡馬。萬曆四年。以二鎮援兵。迎送夷使。疲苦。議准。將互市馬。及各路老家營軍。撥給大同。新平。得勝二堡。馬各三百匹。軍各二百名。平遠。保平。鎮羌。弘賜等四堡。馬各二百匹。軍各一百名。其沿邊每

城堡各一百匹。老軍喂養。宣府驛馬二百匹。中路趙川堡馬六十匹。北路龍門等四城堡馬各五十匹。上西路三城堡馬各五十匹。膳房等八堡各三十匹。懷安城五十匹。每馬撥一軍喂養。專一供應夷使。

洮河各營馬。隆慶二年題准。河州叅將營歲給茶易馬五十匹。樁朋銀買馬五十匹。洮州歲給茶易馬二百匹。內裁減一百匹。解苑牧養。

固原。延綏。寧夏三鎮馬。嘉靖三十五年議准。陝西苑馬寺孳養馬匹。每年准給固原。延綏。寧夏三鎮共馬二千匹。內一千五百匹。專給固原。五百匹。延寧二鎮分年輪給。甘肅軍士買馬。隆慶三年議准。每匹定給樁朋銀十兩。

凡

親王出府關馬一百匹。及倒死補給。例於太僕寺寄養馬內選取。送御馬監印烙給軍。

**買補**

馬匹倒失。例合買補。其後有追納樁朋及老病

變賣年久免追之例

凡買補孳牧馬匹。洪武榜例。倒失者從民議和。或一縣。或三五羣長。贖價買補。三歲以上。八歲以下。高四尺以上。堪中馬匹。還官。聽候驗印。作數。違錯及遲延者。一體追駒。○成化元年。令各處買補孳生馬駒。有司四匹。軍衛五匹。折買堪操騎馬一匹。以充備用。例後倒失者。騾駒三匹。兒駒二匹。各折買騎馬一匹。羸駒每二匹。折買兒馬一匹。○弘治九年。奏准。各處倒失馬駒。應買補者。遇孳生蕃息之時。量徵價銀。解京。以備

各邊買馬之用。大馬一匹。徵銀五兩。駒一匹。倒失者。徵銀三兩。虧欠者。二兩。○正德二年。榜例。種兒騾馬。年齒未老。作踐倒死者。責令馬頭賠償。其馬俱印烙。以便查考。○十二年。奏准。軍民原領孳牧并騎操馬。倒死。告官。相剝。其皮張鬃尾肉臟。許馬戶自賣。贖銀買補。還官。凡買補寄養馬匹。弘治二年。奏准。寄養馬倒死。告官。給印信文帖。相視。開剝。如無文帖。而開剝者。以盜賣論。○三年。令馬齒未老。而作踐成疾。不堪充軍者。原領人戶。追罰銀二兩。○又令寄

養備用馬倒失。買補不及五分者。掌印管馬官俱住俸追陪。○嘉靖二年題准。各處倒失備用馬匹。分別年分遠近。係正德十年以前者。照舊每匹徵銀十兩。十五年以前者。每匹加銀二兩。十六年。并嘉靖元年以後者。俱追陪本色。其係正德十五年官員騎傷。兌下弱馬。照正德十一年例。每匹追銀五兩。○四十二年議准。領養十年以上倒失者。追銀十二兩。以下。追補合式大馬。其老病者。亦須領養十年以上。方許變賣。照倒失例追銀。○四十五年議准。寄養馬不堪兌

軍者。不必拘十年以上例。即照借兌次數變賣。

價銀。及買補本色。其贓罰馬匹。止照時估變價。

舊例借一二次者。追銀十兩。三四次者。八兩。未經借兌者。追補合式大馬。○隆慶四

年議准。寄養馬倒失變賣者。各照議定期限。走失者。限三箇月。變賣者。限六箇月。倒死者。限一年之內。買補完足。

凡借兌馬匹。嘉靖四十一年議准。防邊借兌寄養馬。果有瘡瞎損傷。喂養難痊者。另註一冊。以備照查。其冊內損馬。有臨時與中途倒死者。納皮張銀四錢。三月之內倒死者。納肉臟銀五錢。

三月之外倒死者。納銀五兩。其贍息少減。不係  
癘瞎者。不得槩比。止查借騎月日。又近。不拘何  
處借還。在三月之內倒死者。比保定例追銀十  
兩。借還過三月之外倒死者。比遼東例追銀七  
兩。

凡京營騎操馬匹。天順二年。令倒死者。告官相  
剝。坐營官責限該營軍朋合買補。走失被盜。一  
例追陪。○成化十三年。奏准各營下場倒失馬  
匹。買補不及八分者。領

勅及把總管隊官住俸追買。不下場者。以五分為

則。○弘治二年。奏准買補騎操馬匹。須四歲以  
上。八歲以下。價自十二兩至十五兩。官軍自願  
添價收買者。聽。○九年。奏准凡騎操馬匹。原領  
者。以承領日為始。買補者。以印烙日為始。計在  
十五年外。許賣銀納官。另給。其未及十五年而  
病者。亦准賣。仍追本身椿頭銀。貼價買補。○嘉  
靖二十八年。議准倒失者。坐營把總官呈赴巡  
視科道。驗明掛號。赴本司決打。照年限遠近。扣  
算椿銀。給單發營追徵。解太僕寺收貯買馬。仍  
類行戶部。扣除草料。○三十一年。題准京營馬

查有老弱篤廢揀選估計變賣價銀發太僕寺收貯以備買馬○三十二年題准倒死者當日呈報本營將官驗剝如三日不報本軍送問管隊軍併治仍扣糧一月該營將官務在三日內即差把總官帶本軍赴車駕司決打討單追椿起解不許延緩○隆慶二年議准京營軍士選編上中二等養馬如該管官縱容貧軍冒領以致倒失不准追椿責令千把總本隊官并本官買補○三年奏准各營將官嚴督官軍務要用心餽養馬匹以後遇有倒死查果不係作踐如

領養一年以上者比常量加追銀一兩二年以上者比常量加五錢五年以上者仍照例追椿凡京營家丁馬匹隆慶二年議准倒失者免其追椿令本馬家丁出銀三兩其餘各丁有馬者出二錢無者五分朋驛買補

凡巡捕馬匹嘉靖三十七年議准倒死者止赴該管兵科報驗掛號徑赴車駕司決打討單該營追收椿銀起解○四十四年令巡捕瘦馬年終估驗變價買補○萬曆二年議准巡捕馬倒死或瘦損不堪馬主稍有力者責令買補赴部

會典卷一百五十五  
五  
驗准送寺印烙發營給軍騎巡

凡錦衣衛直差馬匹隆慶二年議准各該委官不許尅減草料及借雇與人騎坐如有作踐倒失者就於本名下追買好馬還官○又議准本衛將見在馬備造原領官校姓名并馬匹毛齒青冊一本送兵部行令該司各給勘合一張備載領馬年月毛齒以便查對如有倒死俱開送兵部該司查明方許買補其所補馬匹亦赴該司驗中送寺印烙改給勘合每年俱要赴寺印烙差占者候事完之日仍行補銷毛齒不對者即不准印定以抵換盜賣治罪

凡勇士營馬匹成化二年令勇士馬倒死二次者不許重關照京營例追補○隆慶二年議准倒死照四衛營例決打分別年限追納椿銀凡各衛軍餘馬匹成化七年奏准各衛軍餘關領馬匹倒死以物力等第出銀每馬一匹上戶出銀三兩中戶二兩下戶一兩餘以屯田子粒銀貼贖買補

凡椿朋銀兩成化十三年奏准京營馬倒失其馬主係都指揮者出銀三兩指揮二兩五錢千



百戶鎮撫二兩。旗軍一兩五錢。走失被盜者。各加五錢。謂之椿頭。○又令各營馬隊官軍。每歲朋合出銀。歲以六箇月為率。每月都指揮指揮出銀一錢。千百戶鎮撫七分。旗軍五分。遇馬倒失。貼助買補。在外各邊。悉照此例。○弘治六年。奏准。各營朋銀買馬不敷。每馬一匹。聽支草場租銀三兩貼助。○嘉靖二十二年。奏准。凡遇官軍倒死馬匹。領養一年者。旗軍追罰銀三兩。千百戶鎮撫四兩。指揮五兩。都指揮六兩。二年以上者。旗軍二兩。千百戶鎮撫二兩五錢。指揮三兩。都指揮三兩五錢。五年以上者。旗軍一兩五錢。千百戶鎮撫二兩。指揮二兩五錢。都指揮三兩。十年以上者。旗軍一兩。千百戶鎮撫一兩五錢。指揮二兩。都指揮二兩五錢。走失被盜者。各加五錢。按月追完。造冊解部稽查。發寺收候買馬支用。其領養十五年以上者。免追椿銀。○二十九年。題准。今後各營遇支放糧料草束折色之時。預將應出朋銀官軍姓名。并朋銀數目。造冊送部轉送戶部照數扣除。有餘方行給散。不足。下月補扣。其扣過銀兩。戶部印封送部轉發。

太僕寺收候買馬支用○四十二年題准該營將倒死馬匹盡數查出有單者照單徵椿無單者照新馬倒死事例止追銀三兩以後倒死馬匹備呈巡視科道掛號徑自赴車駕司決打給單發營追椿其太僕寺及別項比較掛號并年終參奏俱行停免

凡外營馬匹嘉靖四十五年議准保定各營馬倒死於本軍名下追銀三兩本司隊朋出銀九兩共十二兩買補有願納椿銀者聽○隆慶四年題准增補昌平鎮馬匹如有倒死本軍追椿

銀三兩每月馬一匹扣徵朋銀一錢貯昌平州庫以備買馬○萬曆元年題准通州參將營馬倒死照張家灣備禦營例呈報兵部該司決打給單追椿每年二次起解交納

凡各邊馬匹嘉靖十五年議准陝西苑馬寺每年清查監苑牧養馬匹年齒壯實可用者造冊送巡按衙門備照遇邊鎮官軍騎征馬倒死或槽下倒死行令各邊分巡兵備等道及太僕寺查明給領仍照舊嚴追椿銀收貯以備買補○三十一年以陝西各苑種馬數少議准給本省

贓罰等銀四萬兩買補。以後缺少。止查苑馬二寺收貯地畝椿朋銀兩。題討買補。○三十八年題准。山西鎮各營騎操馬倒失。行令各營朋合攤轉。并肉臟銀買補。○三十九年議准。陝西各苑馬老病矮小。不堪作種。給征者各用退字火印。照依時估定價變賣。就將前賣過價銀另買。臚馬分發各苑無馬軍丁領養。仍將賣過馬羸收過價銀造冊奏繳。每三年變賣一次。○四十年議准。山西鎮轉銀買馬。累軍不便。仍照例追納椿朋銀。解行太僕寺收貯買馬。○又議准。

各邊官軍馬匹對敵陣亡。及追賊走傷倒死者。椿銀免追。出哨在途倒死。追肉臟銀五錢。拐馬在逃。務令緝獲。馬免別軍。本軍問罪。○隆慶二年議准。固原入衛官軍馬匹倒死。八年以裏者。照近例行。以外不論官軍。追納肉臟銀五錢。十年以外者俱免。○三年題准。陝西七苑不堪馬匹。查係牧軍陪補者。退令另買大馬。該寺量助贖銀三分之一。以後追補。必驗合式印牧。係茶易銀買者。變賣另買。仍行行太僕寺。將茶易銀買馬。點驗堪牧。堪俵。方准印烙發苑。○六年。以

陝西歲課馬駒。每匹追銀三兩。利於納銀。虧欠數多。議准將各苑種馬。嚴責孳駒。如有倒失。虧欠。俱追補馬駒。不許納銀。○又題准。剡鎮各營朋攤買馬。困累。宜行禁革。發銀三萬兩。買補。以後每年請討。給本色馬一千匹。馬價銀一萬八千兩。○萬曆元年。議准。遼東買補馬匹。無別項椿朋官價動支。及置買火器。缺乏。贏頭馱載。動支行太僕寺馬價銀一萬七千兩。內將一萬兩分貯兩河。如遇馬匹臨陣倒失。免軍賠償。即委官赴市收買好馬給軍。再有倒失。方責本軍買

補。其七千兩。買贏應用。○二年。議准。陝西苑馬寺缺少種馬。將該寺庫貯茶課等銀。歲解固原鎮二千兩。給軍自買。於年例應解該鎮馬二千匹內。扣留二百匹。在苑作種。○三年。題准。固原鎮朋合地畝銀。徵解陝西行太僕寺。路遠弊多。宜行該管各司道官。將本鎮官軍每年應出朋銀。就於俸糧銀內扣留。地畝銀兩。隨同屯田糧草。一體徵收。另行收貯。聽買馬支用。不許別項那借。其收支數目。監收官。每半年一次。開報行太僕寺類查。

凡邊驛站軍馬匹。隆慶五年議准。如領養一年倒死者。納椿銀五兩。二年者。四兩。三年者。三兩。四年者。二兩。追收在官。候缺馬之日。連銀解部發寺關馬。五年以上倒死者。官為補給。

### 禁約

凡管馬官員。洪武榜例。各衛所府州縣管馬官員。職專提調馬匹。不許管署衛所府州縣事務。及別項差占。○弘治十四年奏准。凡司府州縣。并分巡分守官。並不許差委管馬官員。如違。聽巡按御史。及分管寺丞糾舉。應提問者。提問。應

參奏者。參奏。撫按官亦要一體遵依。毋擅差委。○凡軍衛有司。大小官員。但有作弊虧欠馬匹。及非理抗拒者。聽本寺并分管寺丞遵照。

太祖高皇帝聖旨。應舉問者。舉問。應參奏者。指實具奏。定奪。○正德二年題准。養馬府州縣正官。推調不理馬政。俱依錢糧軍伍例。不准考滿。司督府。府督州。州督縣。各令管馬官著實舉行。管馬官有故。則掌印正官帶管。違者。聽兩京太僕寺堂上分管官參究。○凡養種馬。府州縣官一年四次。太僕寺一年二次點視。病瘦量為懲治。倒

失者立限賠償。病瘦倒失十匹以上。管馬官查提究問。

凡私用官馬。宣德四年。令官軍人等不許將官馬閒時帶鞍騎坐。馱載物件。兩人共騎。及婦女騎坐。違者。御史給事中。同錦衣衛官。拏送本部。罰馬一匹。仍送法司問罪。○成化六年。令管軍官將官馬撥送與人。跟隨迎送。或識字人騎。占聽候。并賃借與人。致令傷死者。問罪。照例罰馬入官。在外各邊。例亦如之。○弘治二年。奏准。官司借用寄養馬。二匹者。罰一匹。五匹者。罰二匹。

年終。分管寺丞。具有無追罰數目。奏報。○三年。奏准。管軍內外官。私占官馬。及借撥與人者。五匹以下。降一級。以上。降二級。俱發邊衛立功。借者一體論罪。○九年。令凡借撥官馬。至瘦損倒死。州縣五十匹。府二百匹以上。借者。及管馬官。各降一級。○十年。令管軍官撥借官馬。馱載圍獵者。五匹以下。罰馬一匹。以上。罰二匹。十匹以上。罰三匹。傷死者。五匹以下。降一級。六匹以上。降二級。馬各抵數。追償。○十三年。奏准。凡官軍將所領官馬。耕田走遞。馱載物件。或兩人共騎。

或婦人騎坐者。依宣德四年禁例問罪。俱罰馬一匹。若雇與人騎坐等項。枷號半箇月。及借與人。各彼此罰馬一匹。○凡在京坐營管操內外官。并把總以下官。若將馬匹私占騎用。及撥與人騎坐者。五品以下。降一級。以上。降二級。其各邊分守守備把總管隊等官。將騎操并驛傳走遞官馬。擅撥與人騎坐。及私用伺候等項。亦照前例問擬。○嘉靖二十三年議准。有將官馬雇借騎馱者。照例追問。仍將追罰馬匹。每匹折銀十兩。送太僕寺交納。以備買馬之用。○又議准。

京營管操把總等官。占馬及送馬與人騎坐。除照例降一級外。其有勢要求迫者。亦照例治罪。凡擅調官馬。嘉靖二年奏准。在外各該衙門。未經奏准。輒於所屬擅調寄養孳牧馬匹者。比私借官畜產律。私自借用。或轉借與人。及借之者。各笞五十。追雇工賃錢入官。若計雇賃錢重者。坐贓論。加一等。倒失者。比毀失官物坐罪。違者。許太僕寺執奏。兵部參究治罪。凡盜賣官馬。宣德四年。令追罰馬二匹。知情和買牙保鄰人。各罰馬一匹。宰殺。及偷賣官羸者。

亦如之。首告者於犯人名下追鈔五千貫充賞。  
○凡巡馬官每三月一換。○弘治間奏准養馬  
人戶盜賣官馬至三匹以上者問擬盜官畜產  
罪名發附近衛所充軍。其盜賣寄養馬者亦如  
之。知情和買者民發擺站軍發邊方瞭哨。○嘉  
靖二年奏准盜賣騎操官馬及照例罰馬人犯  
儘產變賣買馬還官。如果貧難免其追罰軍調  
邊衛民發附近衛所永遠充軍遇赦不宥。其各  
營把總地方守備等官遇前操軍盜賣和買官  
馬三匹以上者降一級。五匹以上者罪止降三

### 級

凡借點馬匹宣德九年令兵部官同御史給事  
中點視征操馬匹借點及借與者共追馬一匹  
馬無見在及隱漏不報者查追仍勘其冒支草  
料加倍追納

凡下班馬匹宣德七年令外衛官軍原領騎操  
馬匹下班之日不許帶回。○弘治十三年奏准  
下班官軍將原領馬匹兌與見操缺馬官軍領  
騎餵養。若有擅騎回衛者問罪罰馬一匹。解兵  
部給操。其原領馬匹倒失者追陪。

與成化元年  
例同



會典卷一百五十五  
三  
凡起解馬匹。天順二年令官軍人等強奪起解馬匹者。問罪罰馬一匹。仍枷號一箇月。○成化十年奏准。各處解馬赴京。有兜攬價值。將老馬攬雜驗印者。俱問罪。發邊衛充軍。其起解馬。除例應折納外。有齎價赴京。通同收買者。問罪。○弘治十三年奏准。凡司府州縣起解備用馬匹。各要經由分管太僕寺寺丞等官驗中起解。若有馬販交通官吏醫獸人等。兜攬作弊者。俱問罪。枷號一箇月。發邊衛充軍。再犯累犯者。枷號一箇月。發極邊衛分充軍。○嘉靖二十年題准。

各該解馬人員。不赴部寺投文。通同馬販醫獸人等。旋買馬匹作弊者。聽部寺及該城御史密切訪拏送問。用大枷枷號一箇月。發極邊衛分充軍。

凡中賣馬匹。弘治五年奏准。各邊軍民將不堪馬匹。設計中賣。及管軍官以私馬俵與軍士。多支官價者。官軍調邊衛帶俸食糧。民及餘丁。附近充軍。通同作弊者。枷號一箇月。發落。○凡大同三路官旗舍人軍民人等。將不堪馬匹。通同光棍。引赴內外官處。及管軍頭目。收買私馬。詭

令伴當人等出名。情囑各守備等官。俵與軍士。通同醫獸作弊。多支官銀者。俱問罪。官旗軍人。調別處極邊衛所。帶俸食糧差操。民并舍餘人等。俱發附近充軍。引領光棍。并作弊醫獸。及詭名伴當人等。各枷號一箇月發落。干礙內外官員。奏請提問。○正德十六年。奏准。有倚勢兜攬。囑託賣馬。及通同官吏醫獸人等。作弊估價。瞞官害民者。俱用百斤大枷。枷號一箇月。滿日。官軍俱調極邊衛所差操。舍餘人等。俱發邊衛充軍。官吏醫獸人等。一體重治。干礙內外勢要人

員指實奏治

凡尅減草料。成化四年。令官軍勇士。私賣官給草料。以致馬匹瘦死者。巡綽官緝拏。并買主送問。○弘治三年。奏准。把總等官尅減官馬草料者。計贓滿貫。發邊衛立功。滿日。就彼帶俸。盜賣者。發瞭哨。買至料豆十石以上者。充軍。○十四年。奏准。官軍關支馬料。委官一員管領。若縱容盜賣者。發邊衛立功。滿日。就彼帶俸。買者。問罪畢日。枷號一箇月發落。

大明會典卷之一百五十二

大明會典卷之一百五十三

兵部三十六

馬政四

比較

國初比較。止于孳牧馬駒。以倒失虧欠行罰。其後各府寄養京邊騎操之馬。皆有稽查事。悉領于太僕。法例滋備矣。

凡比較馬匹則例。洪武間定。凡管馬官吏。時常下鄉提督看驗馬匹。要見定駒若干。顯駒若干。重駒若干。明白附寫。以俟太僕寺官出巡比較。正月至六月。報定駒。七月至十月。報顯駒。十一

月至十二月。報重駒。凡季報原領馬為舊管。買補孳生為新收。事故交俵等項為開除。季終為實在。春季二月二十四五。夏季六月二十四五。秋季九月二十四五。冬季十二月二十四五。徑送太僕寺類繳。其有生質竒異與種馬不同者。明白申報。凡比較點馬文簿。要開原領孳生兒。騾馬數。分豁該算駒者若干。不該算駒者若干。已生及未生者若干。原馬齒色及所生駒毛色。逐一開報。凡倒失種馬。虧欠馬駒。俱在年終完備。如是不完。府州縣正佐首領官吏。決杖二十。

管馬官吏。加等痛治。凡管馬官。有關茸貪污害民者。分管及所在掌印官。開奏以除民害。○嘉靖二年議准。各府州縣官。置立循環文簿二扇。用印鈐記。循簿開寫。春秋月分。環簿開寫。夏冬月分。各馬匹毛齒。馬頭姓名。仍備開臆。損有無倒死買補若干。一留本府。一發州縣。循去環來。按季查考。管馬通判出巡。吊取州縣簿。分管寺丞出巡。吊取府簿。查對點視。其在各府并太僕寺簿籍。用太僕寺印鈐。循去環來。按季查考。三年印烙。改造一次。○六年議准。府州縣掌印官。

原有提調責任。裁減衙門。亦係兼管馬政。管馬官員。職專管馬。不許別項差委。各該分管寺丞。每年終。將各府管馬官。并州縣正官。及管馬官員。從公考察。開具賢否揭帖。呈部轉送吏部施行。○十年奏准。各州縣管馬官員。於起俵之時。備將經管種馬。備用馬。并折色。及草場子粒。已未徵完。馬戶。見在逃移數目。造冊赴太僕寺查比。管馬通判。於年終掣總之日。備將各州縣馬匹。錢糧等項。如前造冊。并將各管馬官員。公同掌印官。填註考語。親齎送寺。本寺掌印官。參酌

停當。填註賢否。送兵部轉送吏部查考。凡比較孳牧馬匹。成化二年奏准。管馬官三年任內。孳生不虧者。稱職。額外多生者。量加旌擢。不及額。至百匹者。降用。分管寺丞。以所屬課額虧增。遞為黜陟。○七年奏准。府州縣掌印首領官。任內馬匹虧欠。孳養不增者。九年不准給由。措置完日。與管馬官一體降用。○弘治二年奏准。每二年。差太僕寺少卿二員。南京太僕寺少卿一員。分往北直隸。河南。山東。南直隸地方。比較該納馬駒。每歲終。分管寺丞。具管馬官賢否。

呈部。六年之內。馬匹無虧者。量加旌擢。以外。虧損數多。照例黜罷。○九年。奏准。府州縣買補馬匹。不及五分者。正官住俸一月。不及四分者。兩月。不及三分者。三月。京縣不拘多寡。止住一月。其管馬官不及五分者。全住。

凡比較寄養馬匹。弘治三年。奏准。順天府所屬寄養馬匹。專差太僕寺少卿一員。比較。○正德十三年。奏准。差少卿一員。比較寄養馬匹。如有倒失。照京營騎操馬匹事例。限三箇月。以裏。報官賠償。如年終不完五分以上者。將州縣掌印

管馬官。及各府管馬通判。住俸追補。○隆慶元年。議准。寄養馬匹。罰治例輕。定擬分數。匹數。罰俸降級。倒失者。馬少州縣。至三十四匹。中等州縣。至四十匹。馬多州縣。至五十匹以上。瘦損者。馬少州縣。至四十匹。中等州縣。至六十匹。馬多州縣。至八十匹以上。各掌印官。降一級。調用。各府通判。降一級。掌印官。奏聞區處。○三年。議准。每年防秋調兌之後。計馬數多寡。以一百匹為率。三十匹不堪者。降級。加至五十匹以上者。降調。

○四年議准。各該州縣以後寄養馬匹倒失變賣者。各照議定期限。走失者限三箇月。變賣者限六箇月。倒失者限一年。俱各補完。如積至三十匹不補者。住俸。四十匹者。罰俸。五十匹者。降級。

凡比較衛所馬匹。永樂三年。令衛所孳牧騎操馬匹。每三年一次造冊。管馬官齎執赴京比較。○成化七年奏准。衛所掌印官馬數不完。許分管寺丞。與兵部委官一體比較。○弘治四年奏准。衛所騎操馬。免比較。其有孳牧去處。照例每

三年。委官赴部比較。凡虧欠埋沒違限等項。參奏提問。

凡比較京邊騎操馬匹。成化二年奏准。京營及各邊騎操馬匹。專差太僕寺少卿一員。無太僕寺去處。從巡撫并分巡官比較。如有倒失。限三月。以裏督令賠償。○十三年奏准。各營各邊。每年四月十月二次。將原領事故買補馬匹數目具奏。以憑比較。○弘治九年奏准。各營馬買補三分不完者。把總等官住俸一月。四分以上。兩月。五分以上。三月。坐營官通計三分不完者。住

俸一月。五分以上。兩月。○嘉靖十二年議准。存  
操巡捕。并錦衣旗手等衛馬匹。一年以百匹為  
率。倒失十匹以上。送問。七匹以上。罰治。不及數  
者。免究。全無者。量加犒賞。原管數少。而倒失不  
多。及全無者。不在此限。○十七年議准。各營凡  
遇各軍倒失馬匹。從實開報。領馬年月。黏連原  
領票帖。赴司告理。候年終。比對兌馬文冊。果領  
十年以上。倒死者。把總官員免叅。十年以下者。  
仍以百匹為率。二十匹以上。把總官送問。十五  
匹以上。罰治。不及數者。免究。仍行太僕寺少卿。

詣營點驗舊印模糊者。許令重印。不必一槩盡  
烙。致有傷損。○四十二年議准。專委兵部司官  
一員。管理倒失馬匹。仍聽巡視科道兼管查驗。  
倒失馬數。年終一體查叅。○四十三年議准。京  
營巡捕勇士四衛等營騎操馬匹。每年終巡視  
京營科道官。查將倒失馬數。遵照本年定例。分  
別題叅。後又令各官。倒死馬數。雖多。原管馬數  
實少者。免降級。止罰俸。提督少卿。于每年印烙  
馬完日。將臨印不到馬匹。并查有拐逃隱匿等  
項。各把總官軍題叅。○又議准。京邊倒失馬匹。



以一百匹為率。倒失五匹者為上等。免究。十匹至十五匹為二等。千把總罰俸兩月。副叅遊守等官罰俸一月。二十五匹者為三等。千把總降一級。副叅遊守等官罰俸三月。三十匹以上者為下等。千把總降二級。副叅遊守等官罰俸半年。仍查追完椿銀八分以上。方准開俸。總兵官以一千為率。倒死一百匹為上等。免究。一百至一百五十匹者為二等。罰俸一月。二百五十匹者為三等。罰俸三月。三百匹以上者為下等。罰俸半年。亦查追完椿銀八分以上。方准開俸。○

隆慶二年題准。薊昌宣府各鎮將騎操馬匹。置立循環文簿。送太僕寺提督馬政少卿。倒換稽查。每年終聽少卿點閱一次。宣府永平山海等處。地方懸遠。聽行各兵備道就近點閱。有倒失數多者。該管將領聽其參究。

凡比較京府馬政。成化十四年奏准。比較馬政。兩京府尹府丞聽納米贖罪。

凡查比苑僕馬政。弘治四年奏准。遼東陝西苑馬寺孳牧馬匹。每三年一差官點閱。其各行太僕寺苑馬寺於

內府關領精微文簿。將騎操孳牧馬匹。逐一填寫繳部送。

內府交收。○嘉靖十五年議准。陝西山西遼東行太僕寺。每年春秋二季。點視官軍騎操馬匹。如遇倒失。照例追收椿朋銀兩買補。仍將倒死馬。并追完銀兩。買補數目。造冊奏繳。送部查考。如該寺分管官員。不行按季點視。以致追補數少。聽撫按指名具奏。本部年終類參罰治。仍咨吏部。候朝覲年考察黜退。○三十一年題准。陝西苑馬寺。令巡茶御史督理各監苑倒失馬匹。虧

欠馬駒。將寺卿丞。并監苑各官查參。陝西巡茶一年一次。遼東巡撫都御史。三年一次。各題察到部。覆行原參衙門。照例提問罰俸。○隆慶元年議准。陝西各苑馬。如孳生虧欠五分。倒失又多過一分者。照買補例。分等罰俸提問。其孳生多而虧欠少者。雖未買補。亦酌量免罰。孳生少而倒失虧欠多者。雖已買補。仍加究治。寺監官吏。亦准通算究治。計開每年比較地方。

太僕寺所屬

南京太僕寺所屬

三年比較地方

遼東苑馬寺所屬

山西行太僕寺所屬

陝西行太僕寺所屬

陝西苑馬寺所屬

甘肅行太僕寺所屬

南京應天衛

南直隸宣州衛

山東濟南衛

平山衛

登州衛

寧海衛

成山衛

鰲山衛

靈山衛

安東衛

威海衛

大嵩衛

濟寧衛

臨清衛

靖海衛

奇山千戶所

寧津千戶所

海陽千戶所

膠州千戶所

諸城千戶所

東平千戶所

肥城千戶所

浙江磐石衛

海寧衛

江西袁州衛

饒州千戶所

廣東雷州衛

廉州衛

四川成都右衛

成都中衛

建昌衛

建昌前衛

寧番衛

越雋衛

會川衛

鹽井衛

湖廣武昌衛

武昌左衛

靖州衛

五開衛

沅州衛

九溪衛

長沙衛

清浪衛

黃州衛

銅鼓衛

永定衛

蘄州衛

平溪衛

永州衛

衡州衛

辰州衛

岳州衛

沔陽衛

常德衛

鎮遠衛

偏橋衛

施州衛

荊州衛

荊州右衛

顯陵衛

瞿塘衛

襄陽衛

承天衛

房縣千戶所

竹山千戶所

枝江千戶所

長寧千戶所

澧州千戶所

夷陵千戶所

德安千戶所

忠州千戶所

雲南雲南左衛

雲南右衛

雲南中衛

雲南前衛

雲南後衛

雲南衛

曲靖衛

六涼衛

平夷衛

越州衛

臨安衛

楚雄衛

洱海衛

大理衛

大羅衛

蒙化衛

景東衛

瀾滄衛

金齒衛

騰衝衛

楊林千戶所

馬龍千戶所

木密關千戶所

宜良千戶所

安寧千戶所

易門千戶所

收買

貢馬附

國初各處土官衙門秋糧各依原認數目折納馬匹。有糧二十五石有餘折馬一匹者。有五十餘

石折馬一匹者。起解到部。令醫獸辨驗明白。具奏送御馬監交收。馬或不堪。責令差來土官陪納。後土官糧馬多。就近輸納。或以折色。無復解京者。其四夷進貢馬匹。即於各衛所俵給。缺馬官軍騎操。此外惟取給於收買。收買之法。或以茶。或以鹽。或以互市。或以價銀。洪武間。官給價鈔於各處收買。并茶易到馬匹。或就彼給軍。或解京交納。令駕部知其數。及永樂初。乃開市於遼東。正統初。又中鹽於靈州。其流漸廣。今茶法通行。而互市亦不止遼東矣。

凡西番茶易。洪武中。立茶馬司於陝西四川等處。聽西番納馬易茶。降金牌信符賜番族。以防

詐偽。

洮河西寧三衛番族金牌四十一面。該納差發馬一萬四千五十一匹。上號在內府

收貯。易時齋驗。每三年一遣廷臣。召各番合符。以應納

差發馬。交納易茶。有以私茶出境者。斬。關隘不覺察者。處極刑。民間蓄茶。不得過一月之用。茶戶私鬻者。籍其園入官。○二十三年。定茶易馬例。上等馬每匹一百二十斤。中等馬每匹七十斤。下等馬每匹五十斤。○三十年。令朶干烏思藏長河西一帶西番。依舊將馬出來換茶。仍出

榜禁約。通接西番經行關隘。偏僻小路。著都司差撥官軍三四層嚴謹把守巡視。但有將茶私出外境。即便拏解赴官治罪。不許受財放過。必須窮究何處官軍地方放過。治以重罪。○永樂十三年。遣御史三員。巡督陝西茶馬。○正統十四年。停止茶馬金牌。後每歲遣行人四員。巡察私販。自潼關以西。至甘肅等處。通行禁革。○成化十四年。奏准。定差御史一員。領

勅專理茶馬。每歲一代。遂為定例。其易馬須四歲以上。六歲以下。高大堪中者。方准收買。兒驕馬

就彼給各邊騎操。騾馬送苑馬寺孳牧。如有縱容軍民。通同中賣老病馬匹者。御史同兵備及苑馬寺官。驗視退回。仍指實參究。○十五年。令巡茶御史。招番易馬。不拘年例。願來者聽。○弘治五年。奏准。每年招易母多增馬數。坐派軍衛。逼令漢人代納。及收買不堪。以致倒死。負累解送官舍補陪。○八年。議准。招易馬匹。兒驕馬要四歲以上。不必解寺。就給與各衛領養。騾馬亦要高大。發苑馬寺作種。瘦損倒失者。比較追陪。○十年。奏准。茶易馬。除就彼給軍外。其餘差官

陸續解赴苑馬寺交割俵養○正德十年議准領馬官軍每年用限三月以裏齎赴巡茶御史驗撥軍限八月以裏到彼交兌違者行該衛徑申巡撫都御史究治限外用過兩月軍一月不到聽巡茶御史叅究各經該官吏其洮河延寧馬匹亦要隨時斟酌通融派撥○嘉靖十一年議准西寧洮河三茶馬司貯庫商課茶斤及西安等衛并徽階等州收貯私茶俱送三茶馬司不拘常例麤細搭配招易臆壯馬匹開送總制衙門給軍騎操事完造冊奏繳仍造青冊送部

查考○三十年題准改造勘合分給諸番每歲依期齎執前來比號納馬酬以茶斤如有背違調軍征勦○又題准年例馬完番有餘馬司有餘茶許其增中解牧洮州增至一千二百五十匹河州增至一千七百四十匹西寧增至二千四百三十匹○三十一年題准馬政茶法二事相須准令巡茶御史兼管馬政督理二寺事務○三十七年議令茶商收買民馬抽稅給票許其販賣禁其夾帶至四十年仍禁止茶商販賣民間馬匹官為買用○四十一年議准甘州建



置茶馬司一所。照例招商中茶。招番易馬。仍將西寧舊額茶馬。甘州新開茶馬。俱招中。酌量地方遠近。通融給軍騎操。仍將四川折色課茶。改徵本色運用。○四十三年題准。以後每年開茶。仍止五六十萬斤。商人以一百五十名為上。勒限買茶報中。○又題准。禁約洮岷私馬。臨鞏馬。暫許通賣。○隆慶三年題准。將四川課茶。改徵折色。解苑馬寺。易買種馬。於蘭州招商中茶。運赴甘州茶馬司。招陝西各茶馬司。中納官茶。○又題准。四川巴州。通江南江。廣元。四州縣茶課。

節年拖欠。及未徵者。以後照例改折。無分芽葉。每斤通徵銀一分八釐。類解陝西鞏昌府貯庫。聽甘肅巡撫衙門。差官支取。買馬騎操。○四年議准。以後各茶司中馬。除年例馬數外。儘其調到番族好馬。以茶司見在茶篋。通融招易。毋拘定數。以病商番。○又題准。將洮河西寧三茶司商人。照舊令其闡分完報。於內擇節年完茶之多者。不拘名數。各報甘州茶一引。運至蘭州。責令稅課局官吏。帶管經收。就令管河臨洮府同知。監收盤驗。查照三茶司事例。闡分貯庫立簿。

登報其茶篋應該易馬者量助脚價遞運甘州茶司交割應該給商者令本商運至西寧等茶司貨賣不許越境○五年議准招商茶引定限一年完者厚賞二年量賞三年免究四年問罪抽附茶一半入官五年問罪附茶盡數入官不准再報六年老引照例問遣

凡各處銀易嘉靖十九年題准各該撫按遇太僕寺委官解到買馬銀兩坐委各該產馬地方掌印官協同本寺委官照原議價值給散殷實人戶其馬匹看驗毛齒臆息堪用即便收買若

承委官員通同作弊刁難勒捐者許被害之人徑赴該管上司陳告一應積年攬頭經紀人等有夤緣冒名領銀將老弱瘦馬欺隱驗看等項情弊許所在官司徑自拏問治罪枷號二箇月豪強勢要之家乘機挾要和買者撫按并差去寺丞參究重治○二十年議准陝西三邊重地所產馬匹宜備本處防虜以後發銀買馬不許分派該省

凡各邊互市永樂三年立遼東開原廣寧馬市定價上上馬絹八疋布十二疋上馬絹四疋布

六疋。中馬。絹三疋。布五疋。下馬。絹二疋。布四疋。駒。絹一疋。布三疋。其互市。一於開原城南。以待海西女直。一於廣寧。以待朵顏。三衛。各去城四十里。○九年。定開平馬市價。上馬。一等。絹五疋。布十疋。一等。布十八疋。駒子。布五疋。○十年。令遼東缺馬官軍。聽於各馬市。照例收買。○十五年。重定遼東互市馬價。上上馬一匹。米五石。布絹各五疋。中馬。米三石。布絹各三疋。下馬。米二石。布絹各二疋。駒。米一石。布二疋。○正統十四年。革朵顏三衛互市。○隆慶

五年。北虜納款。請開馬市。議准。宣大山西三鎮。許各開市。每年請發兵部馬價。并本鎮椿朋。及節省客餉銀內。動支買貨備市。多寡斟酌。請給。○六年。山西鎮將市夷馬七百匹。解京。發太僕寺寄養。○萬曆元年。議准。互市胡馬。揀選臙壯。就留本鎮給軍。如有餘剩。即發附近有司變賣。不必解京發養。其山西鎮。每年市馬一千九百餘匹。悉聽給發所屬州縣驛遞。照官價。每匹一十二兩。解送本鎮備用。○二年。議准。將胡馬先調一千匹。充給京營。以後漸次議增。京營原額

馬缺。照舊取給寄養。如額外加多。方給夷馬。○  
又以近來貢市馬匹多老瘠不堪。且來數太多。  
令先期傳諭。使揀選良馬。常年量限數目。以示  
節制。○又議准。薊鎮每年將兵部解發馬價。即  
解宣鎮。易買市馬一千匹。給軍騎操。○三年議  
准。宣大山西三鎮互市夷馬。每年大約宣府以  
一萬八千匹為率。用貨價銀一十二萬兩。大同  
以一萬匹為率。用銀七萬兩。山西以六千匹為  
率。用銀四萬兩。每年正月中。請發兵部馬價。宣  
大二鎮各一萬二千兩。山西一萬兩。餘將本鎮

椿朋。并客餉等銀。轉用。○又議准。各鎮買馬等  
銀。務要定例。依期請討。不得那借增益。以上宣  
大山西

餘詳見職方

凡鹽池開中。正統三年題准。靈州鹽課。招商納  
馬。每上馬一匹。鹽一百引。中馬八十引。馬給軍  
騎。征。○四年奏准。靈州鹽課。照例收馬。候馬。殼  
用。照依馬價折糧。○天順四年奏准。延寧二鎮。  
輪年循環。中納馬匹。○成化二十三年奏准。慶  
陽府每歲委佐貳官一員。監支商人納馬。官鹽  
○弘治九年奏准。每引一百道。折銀十五兩。給

軍買馬○十八年奏准。陝西茶鹽易馬備邊。係是舊制。今後再不許別項奏討。○正德元年。題准靈州大鹽池增課一萬五千引。小池增課三萬引。新舊共五萬九千三百三十七引。每引納銀二錢五分。及收卧引銀一錢。共銀二萬七千六百六十餘兩。送固原慶陽收貯。實馬支用。

凡各夷貢馬。成化五年。題准雲南貴州湖廣四川廣西等處夷人進貢馬匹。行各鎮守總兵巡撫。巡按等官。并布按二司。就彼辨驗等第毛齒。給軍騎操。如鎮總撫按出巡出邊。聽布按二司

辨驗給軍。具奏給賞。○嘉靖四十四年。議准遼東每年貢馬一千五百匹。將一千匹。照舊分俵操軍。五百匹。變價分發各該驛軍。幫買羸頭。

### 內府供應

凡壩上諸馬房。各有乳馬。以供

上用膳羞。如有老疾倒死。兵部奏行太僕寺撥補。永樂間。每歲於陝西茶易馬。及孳生馬內。選取堪中騾馬。送御馬監。分送各馬房領牧。取乳。天順元年。歲選孳牧騾馬五百匹。成化九年。定取初生騾馬。歲百匹。弘治九年。奏准。歲取五十匹。遂

為定例

凡

內府供應乳牛。嘉靖五年議准每隻連犢折價銀六兩。解部轉送光祿寺收用。

凡御馬監備用羸頭。嘉靖八年議准每頭定價銀七兩。順天府派取送。太僕寺收貯。聽其支取。自行收買。又御馬監供用庫酒醋麪局。合用驢頭牛隻。遇有缺少。瘦損。開數奏行到部。行順天府於所屬州縣照數派取。送各監局應用。其不堪牛驢。領出發屬收養。○四十四年議准。

御馬監驢每頭價銀八兩五錢。供用庫酒醋局牛驢每隻頭價一十二兩。免派民間。動支太僕寺馬價銀。發各州縣收買。解寺轉送。○又議准御馬監酒醋局各用牛驢。仍解本色。准供用庫改解折銀。

大明會典卷之一百五十三



